

Achterhook(s)

Afgelopen tied was ik geregeld onderweg naor éne van de Achterhookse gemeenten veur de Wiesneus les. Eén uurken dialectles op de basisschole veur kindere tussen acht en tien jaor. Bienao altied begon ik met de vraoge wee of der een betken plat kon praoten. Meestal stakken dan een paar kindere veurzichtig de vinger op. "Mijn opa en oma praten altijd plat en mijn vader en moeder doen het ook met elkaar, maar niet met ons", was 'n antwoord wa'k vake kregte. Wat jammer is dat en wat laow 'n kansen veur 't behold van de streektaal liggen a'w unze (klein)kindere der neet een betjen van leert. Dat ene uurken, is natuurlek maor ne dröppel op de gleujende plate. Maor de kindere hebt der wal schik in, ze doot tenminste enthousiast met. En a'k op 't ende van de lesse vraoge of ze wet wat 't betekent a'j vraogt of ze 't good wies kapot hebt, dan wet der toch verrassend völle 't antwoord. "Dat zegt mijn moeder ook wel eens tegen mij".

Behalve dialectlessen veur legere en middelbaore schole hef 't Erfgoedcentrum Achterhoek en Liemers ok cursussen veur volwassenen. De cursus Achterhook(s) is al veer keer helemaal vol eboekt ewes en der bunt alweer aanvraogen veur ne nije serie. De cursisten bunt Achterhookers dee meer van de taal wilt leren en ok "inburgeraars" dee endeleks de buurman wilt können verstaon of wat meer wilt weten van de gebroeken, en de natuur en cultuur van de Achterhook. Vake heur ik van de Achterhookse cursisten dat ze 't jammer vindt dat ze vrogger thoes neet wat meer dialect eleerd hebt. Oet angst dat kindere met een accent gin carrière kunnen maken wodden der meestal allene maor Nederlands met eur epraot. Vake bunt unze olde leu toch te bange ewes...

in de mooiste tied van 't jaor wazzen de ritjes naor de scholen trouwens een feest op zich. Wat 'n veurrecht da'w in dit prachtige deel van uns land mögt wonnen en warken. Daor mö'w wal luk greutser op wezzen net as op de taal dee daor bi-j heurt.

Diana Abbink

Juni 2023